



Profil Penerima Agihan Zakat dari kalangan Pelajar Uitm Cawangan Sabah

RAZIZI TARMUJI^{1,a}, NOR ALHANA ABD MALIK^{2,b} dan SAIFUL NIZAM AMRAN^{3,c}

^{1,2 dan 3}Universiti Teknologi MARA Cawangan Sabah, Beg Berkunci 71, 88997, Kota Kinabalu, Sabah, Malaysia

^araziz106@uitm.edu.my, ^bnorah801@uitm.edu.my, ^csaifu775@uitm.edu.my,

Abstrak

Para pelajar di universiti secara umumnya layak menerima zakat jika mereka dikategorikan sebagai asnaf fakir, miskin, fi sabilillah atau mualaf. Bantuan zakat yang diterima sangat membantu pelajar untuk meneruskan pengajian mereka di universiti lebih-lebih lagi jika mereka berasal daripada keluarga yang kurang berkemampuan. Di UiTM Cawangan Sabah, proses permohonan zakat pelajar diuruskan oleh Unit Zakat, Sedekah dan Wakaf UiTM Cawangan Sabah. Pada tahun 2022, seramai 787 orang pelajar telah menerima bantuan zakat sebanyak RM395,640 yang diuruskan oleh unit ini. Kajian ini adalah bertujuan untuk mengenalpasti profil penerima wang zakat yang diagihkan di UiTM Cawangan Sabah. Kajian ini menggunakan *statistical descriptive* dalam mendapatkan frekuensi bagi setiap pembolehubah-pembolehubah yang telah ditentukan. Pembolehubah dalam kajian profil ini termasuklah jantina, kategori asnaf, peringkat pengajian, pendapatan keluarga dan lain-lain. Hasil daripada kajian mendapati majoriti asnaf yang mendapat wang zakat adalah daripada pelajar perempuan dan datang daripada keluarga yang berpendapatan RM1500 ke bawah.

Kata kunci: Agihan zakat, profil, UiTM Sabah, asnaf zakat

Pendahuluan

Universiti Teknologi MARA merupakan universiti yang terbesar di Malaysia yang mempunyai 166,070 orang pelajar di 34 buah kampus di seluruh negara (Bahagian Hal Ehwal Akademik UiTM, 2023). UiTM berperanan besar memberikan peluang pendidikan peringkat tinggi kepada lebih ramai lagi golongan Bumiputera khususnya mereka yang datang dari keluarga berpendapatan rendah. Ini merupakan suatu cabaran yang besar bagi pihak UiTM bagi memastikan pelajar ini dapat belajar dengan selesa dan mempunyai kemampuan kewangan sepanjang tempoh pengajian mereka di UiTM. Majlis Agama Islam Selangor telah memberikan kebenaran kepada UiTM untuk melaksanakan pungutan dan agihan zakat di kalangan warganya melalui surat bertarikh 14 Januari 1998 bersamaan 15 Ramadhan 1418 (Nazrudin Hashim & Mohd Zainoddin Mustaffa, 2012). Ini sekaligus menjadikan UiTM sebagai universiti awam pertama yang menjadi perintis pelantikan Penolong Amil-LZS. Sehingga 2015 terdapat sembilan buah institusi pendidikan awam dan swasta di Selangor diberikan pelantikan tersebut (Muhammad, R. *et al.*, 2017). Unit Zakat UiTM kemudiannya ditubuhkan dan diletakkan di bawah Penolong Rektor Pusat Khidmat Islam Bersepadu (PKIB) hingga Jun 2001. Bermula Jun 2001 hingga 13 Januari 2004, operasinya berpindah kepada tanggungjawab Pusat Pemikiran dan Kefahaman Islam (CITU). Setelah dana Sedekah UiTM ditubuhkan pada tahun 2010, namanya bertukar kepada Unit Zakat dan Sedekah. Unit ini bertukar nama menjadi Unit Zakat, Sedekah dan Wakaf pada tahun 2012 untuk turut bertanggungjawab meluaskan fungsi wakaf di UiTM. Seterusnya apabila CITU dinaiktaraf menjadi Akademi Pengajian Islam Kontemporari pada Oktober 2014, unit ini juga bertukar nama menjadi Pusat Zakat, Sedekah dan Wakaf (Najahudin *et. al*, 2018). Apabila berlaku sekali lagi penstrukturan semula ACIS pada Ogos 2019, unit ini menjadi Bahagian Zakat, Sedekah dan Wakaf yang diasingkan daripada ACIS dan diletakkan terus di bawah seliaan Naib Canselor (Pekeliling Naib Canselor, 2019).

Tadbir urus zakat di UiTM meliputi tiga lapisan pengurusan iaitu Jawatankuasa Akaun Amanah Zakat UiTM, Jawatankuasa Agihan Zakat UiTM (di Shah Alam dan Kampus Cawangan) dan Bahagian Zakat, Sedekah dan Wakaf yang menguruskan kutipan dan agihan zakat (Najahudin *et. al*, 2019). Bantuan zakat merupakan antara mekanisme yang digunakan oleh UiTM bagi membantu pelajar yang mengalami masalah kewangan semasa tempoh pengajian mereka. Di UiTM, Bahagian Zakat, Sedekah dan Wakaf UiTM yang bertanggungjawab mengagihkan bantuan zakat kepada pelajar juga memainkan peranan untuk membantu pelajar yang terkesan dari sudut ekonomi. Contohnya agihan zakat yang diterima oleh asnaf memberikan impak yang positif terutamanya kepada pelajar di UiTM Kedah. Wang zakat tersebut telah digunakan untuk memenuhi keperluan harian pelajar seperti makan minum, pakaian, ubatan dan perawatan pelajar itu sendiri. Ada juga wang zakat digunakan untuk membayar yuran pengajian akibat kemiskinan keluarga walau untuk sementara waktu (Mohd Nasir Ayub, 2022). Di UiTM Melaka Kampus Bandaraya, kebanyakan penerima zakat adalah pelajar perempuan berbanding pelajar lelaki. Ini adalah kerana faktor bilangan pelajar perempuan yang lebih ramai berbanding pelajar lelaki. Begitu juga, kebanyakan mereka mempunyai latarbelakang keluarga yang berada di bawah paras kemiskinan dengan data menunjukkan bahawa jumlah pendapatan keluarga mereka di bawah RM2,000. Selain itu, pelajar yang datang dari kawasan luar bandar merupakan penerima zakat yang dominan (Nor Rafedah *et. al*, 2017).



Pengurusan Zakat di UiTM Cawangan Sabah

Di peringkat UiTM Cawangan Sabah, pengurusan agihan wang zakat UiTM Cawangan Sabah diurus oleh Unit Hal Ehwal Islam (HEI). Apabila berlaku penstrukturan semula ACIS pada tahun 2019, maka UiTM Cawangan Sabah juga menubuhkan Unit Zakat, Sedekah dan Wakaf (ZAWAF) pada Oktober 2020 untuk menguruskan hal-ehwal berkaitan zakat, sedekah dan wakaf di kampus (Razizi *et. al.*, 2022). Perbelanjaan dana zakat di peringkat UiTM Cawangan Sabah adalah melalui persetujuan Jawatankuasa Agihan Zakat dan Sedekah yang dipengerusikan oleh Rektor dan ahlinya adalah Timbalan Rektor HEP (merangkap Pengerusi Ganti), Ketua Pusat Pengajian ACIS, Wakil Pendaftar, Wakil Bendahari, seorang Pakar Rujuk Zakat dan Koordinator Unit ZAWAF sebagai setiausaha (Arahan Amanah Zakat UiTM, 2019). Semua permohonan agihan zakat perlu dibentang dan diluluskan oleh Jawatankuasa Agihan Zakat dan Sedekah. Namun penurunan kuasa untuk meluluskan peruntukan segera diberikan kepada Pengerusi Jawatankuasa Jawatankuasa Agihan Zakat dan Sedekah sehingga RM5000.00. Kelulusan segera ini kemudian perlu dibentang dan diluluskan dalam mesyuarat jawatankuasa agihan (Najahudin *et. al.*, 2019). Akaun ini dikawal oleh Bendahari UiTM di bawah pengendalian Jawatankuasa Akaun. Pengawasan dan pengurusan Akaun ini perlu sentiasa tertakluk kepada terma-terma Arahan Akaun ini, peruntukan-peruntukan Arahan Perbendaharaan serta peraturan-peraturan kewangan yang berkaitan dengannya dan apa-apa arahan lain yang dikeluarkan oleh Perbendaharaan dan UiTM dari semasa ke semasa. Semua terimaan dan bayaran yang dibuat kepada, dan dari Akaun ini hendaklah diperakaunkan oleh Bendahari UiTM. (Arahan Amanah Zakat UiTM, 2019).

Agihan Zakat di UiTM Cawangan Sabah

UiTM Cawangan Sabah telah memeterai MoU dengan Majlis Ugama Islam Sabah (MUIS) pada tahun 2012 sebagai asas kerjasama antara kedua-dua institusi tersebut dalam pelbagai bidang berkaitan pendidikan, penyelidikan dan bantuan kewangan. Bermula tahun 2014, pihak MUIS telah menyumbangkan dana zakat kepada pihak UiTM Cawangan Sabah sebanyak RM100,00.00 setahun untuk menguruskan pengagihannya kepada pelajar. Jumlah ini meningkat kepada RM220,000.00 setahun pada tahun 2020 dan 2021. Selain MUIS, sumber dana zakat UiTM Cawangan Sabah juga diterima daripada potongan zakat gaji staf di Lembaga Zakat Selangor yang akan dipulangkan semula 50% ke kampus, badan-badan korporat dan syarikat perniagaan sekitar Sabah (Razizi *et. al.*, 2022). Jumlah keseluruhan yang diterima daripada tahun 2011 sehingga 2022 adalah melebihi RM3 juta. Wang tersebut telah diagihkan kepada 8087 orang pelajar UiTM Cawangan Sabah (Laporan Agihan Zakat UiTM Cawangan Sabah Tahun 2022).

Jadual 1: Jumlah Agihan Zakat UiTM Cawangan Sabah dari tahun 2011-2022

BIL	TAHUN	JUMLAH PELAJAR	JUMLAH AGIHAN ZAKAT (RM)
1	2011	48	19,200.00
2	2012	68	33,817.00
3	2013	84	42,998.00
4	2014	275	138,360.00
5	2015	1100	435,630.00
6	2016	1441	543,100.00
7	2017	1093	362,150.00
8	2018	727	207,100.00
9	2019	905	366,350.00
10	2020	960	406,750.00
11	2021	599	354,500.00
12	2022	787	395,640.00
JUMLAH		8087	3,305,595.00

Sumber: (Laporan Agihan Zakat UiTM Cawangan Sabah Tahun 2022)

Proses Permohonan Zakat UiTM Cawangan Sabah

Permohonan zakat secara rasminya dibuka dua kali setahun berdasarkan kalendar akademik universiti iaitu sesi Oktober- Februari dan Mac-Julai. Namun begitu, permohonan adalah terbuka sepanjang tahun di luar waktu yang ditetapkan bagi kes-kes tertentu dan kecemasan yang memerlukan bantuan segera. Permohonan bantuan zakat UiTM Cawangan Sabah adalah secara atas talian melalui *link google form* yang disediakan (Razizi *et. al.*, 2022). Pemberitahuan berkenaan permohonan zakat diberitahu melalui laman web UiTM Cawangan Sabah dan juga media sosial. Pelajar juga dikehendaki memuat naik dokumen sokongan untuk permohonan zakat ini seperti salinan kad pengenalan, slip gaji ibu bapa/penjaga dan dokumen lain yang relevan (Razizi *et. al.*, 2022). Bagi pemohon yang berjaya untuk ke sesi temuramah, pemohon hendaklah menjalani proses temubual dengan panel dan pada tarikh yang



ditetapkan samada secara bersemuka ataupun secara atas talian. Selepas diproses selama beberapa minggu, keputusan pelajar yang berjaya menerima zakat akan diberitahu secara rasmi kepada setiap pelajar selain daripada pemberitahuan secara atas talian dengan menggunakan aplikasi *telegram* ataupun *whatsapp*. Bayaran zakat akan diuruskan oleh pihak kewangan dan akan dikreditkan terus ke akaun bank penerima zakat.

Profil Penerima Agihan Zakat Pelajar UiTM Cawangan Sabah

Kajian ini memfokuskan agihan zakat pada tahun 2022 iaitu yang meliputi sesi akademik Mac-Julai 2022 dan sesi akademik Oktober 2022-Februari 2023. Pembolehubah dalam kajian profil pelajar ini termasuklah jantina, peringkat pengajian, jenis penjaga dan pendapatan penjaga. Bagi tahun 2022, seramai 787 orang pelajar menerima zakat sebanyak RM395,640. Pecahan agihan zakat mengikut sesi akademik adalah seperti berikut:-

Jadual 2: Agihan Zakat UiTM Cawangan Sabah tahun 2022 mengikut sesi akademik

BIL	SESI AKADEMIK	BIL PENERIMA	AMAUN ZAKAT (RM)
1	Sesi Mac-Julai 2022	283	145,340
2	Sesi Okt- Feb 2023	504	250,300
JUMLAH		787	395,640

Sumber: (Laporan Agihan Zakat UiTM Cawangan Sabah Tahun 2022)

Dari segi jantina, majoriti penerima zakat adalah dari kalangan pelajar perempuan iaitu seramai 574 orang (73%) manakala pelajar lelaki pula adalah seramai 213 orang (27%). Manakala dari segi peringkat pengajian, pelajar peringkat Diploma merupakan majoriti penerima iaitu seramai 425 orang (54%). Ini diikuti oleh pelajar Ijazah Sarjana Muda seramai 339 orang (43%). Pelajar peringkat Pra-Diploma pula hanya seramai 22 orang yang menerima zakat manakala pelajar peringkat Master hanya seorang sahaja yang menerima zakat. Manakala jika ditinjau dari segi latar belakang penjaga pelajar, majoriti penjaga adalah golongan bapa iaitu seramai 587 orang (75%). Manakala penjaga dari kalangan ibu pula ialah seramai 154 orang (20%). Manakala selebihnya 46 orang pelajar menyatakan penjaga mereka samada datuk, nenek, bapa saudara, ibu saudara, abang atau kakak.

Seterusnya aspek status perkahwinan penjaga pelajar adalah seperti jadual di bawah:-

Jadual 3: Status Perkahwinan Penjaga Pelajar


BIL	STATUS PERKAHWINAN	BIL
1	Berkahwin	591
2	Bercerai	82
3	Duda/Janda	101
4	Belum Berkahwin	13
JUMLAH		787

Sumber: (Laporan Agihan Zakat UiTM Cawangan Sabah Tahun 2022)

Berdasarkan Jadual 3 di atas, majoriti penjaga pelajar masih berstatus berkahwin iaitu seramai 591 orang (75%). Manakala pelajar yang menyatakan penjaga telah berstatus duda/janda pula adalah seramai 101 orang (13%). Ini diikuti dengan status penjaga yang telah bercerai pula adalah seramai 82 orang (10%). Manakala status penjaga belum berkahwin seramai 13 orang (2%) adalah merujuk kepada penjaga dari kalangan abang atau kakak pelajar yang belum berkahwin. Dari aspek pendapatan keluarga pula, majoriti pelajar menyatakan pendapatan ibubapa/ penjaga mereka adalah RM1500 dan ke bawah sebulan iaitu seramai 550 orang (70%). Manakala ibubapa/penjaga yang memperoleh pendapatan RM1501 hingga RM3000 sebulan adalah seramai 210 orang (27%). Manakala hanya 27 orang pelajar (3%) yang menyatakan pendapatan ibubapa/penjaga mereka RM3001 hingga RM4500 sebulan.



Carta Pai 1: Pendapatan Bulanan Ibubapa/Penjaga Asnaf



Sumber: (Laporan Agihan Zakat UiTM Cawangan Sabah Tahun 2022)

Seterusnya dari aspek kategori asnaf pelajar, penerima terbanyak adalah daripada kateogori Fi Sabilillah iaitu seramai 309 orang (39%). Ini diikuti pelajar dari kategori Miskin seramai 292 orang (37%) dan kategori Fakir seramai 186 orang (24%).

Perbincangan

Berdasarkan dapatan kajian di atas, penerima zakat bagi sesi akademik Oktober-Februari 2023 adalah lebih ramai berbanding penerima zakat sesi akademik Mac-Julai 2022. Ini kerana pada kebiasaannya pengambilan pelajar bagi sesi akademik Oktober-Februari adalah lebih ramai berbanding sesi akademik Mac-Julai. Manakala dari aspek jantina penerima zakat pula, 73% adalah dari kalangan pelajar perempuan. Hal ini bukanlah suatu perkara yang mengejutkan memandangkan populasi pelajar universiti sememangnya didominasi oleh pelajar perempuan. Fenomena yang sama juga kalau dilihat komposisi penerima zakat dari segi peringkat pengajian mereka. Pelajar Diploma mewakili 54% dari keseluruhan penerima zakat memandangkan majoriti pelajar UiTM Cawangan Sabah adalah dari kalangan pelajar peringkat pengajian Diploma. Pelajar Pra Diploma tidak ramai yang menerima zakat iaitu seramai 22 orang sahaja (3%). Ini kerana kebanyakan pelajar Pra Diploma telah sedia menerima elaun saku bulanan dari pihak universiti disamping tidak perlu membayar yuran belajar dan kolej. Seterusnya jika ditinjau dari aspek latar belakang penjaga pelajar, majoriti ibu bapa/penjaga pelajar masih dalam alam perkahwinan iaitu sebanyak 75%. Manakala pelajar yang meletakkan ibu mereka sebagai penjaga iaitu seramai 154 orang (20%) adalah samada ibu mereka telah bercerai ataupun kerana ibu yang bekerja manakala bapa sudah tidak bekerja atau bersara.

Seterusnya dari aspek pendapatan ibubapa/penjaga pelajar, hampir kesemua mereka adalah terdiri daripada golongan berpendapatan rendah. Seramai 550 orang (70%) pelajar menyatakan ibubapa/penjaga mereka memperolehi pendapatan RM1500 ke bawah sebulan. RM1500 sebulan merupakan paras gaji minimum yang ditetapkan oleh Kementerian Sumber Manusia yang berkuatkuasa sejak 1 Mei 2022 (Kosmo, 2023). Dari segi kategori asnaf zakat, majoriti penerima zakat merupakan asnaf Fakir dan Miskin yang merangkumi 61% dari keseluruhan asnaf. Asnaf Fi Sabilillah agak tinggi iaitu merangkumi 39% dari keseluruhan asnaf zakat memandangkan pendapatan sebulan lebih RM1200 ke atas sudah mengeluarkan seseorang dari kategori fakir dan miskin.

Kesimpulan

Jika dilihat dari aspek profil latar belakang penerima zakat, didapati kebanyakan mereka datang daripada keluarga berpendapatan bawah RM1500. Begitu juga bilangan yang agak tinggi juga bagi pelajar yang datang dari keluarga yang bercerai atau ibu bapa tunggal. Oleh itu, keperluan adalah lebih mendesak bagi golongan pelajar ini untuk diberi bantuan zakat. Oleh itu, usaha yang dilakukan oleh pihak UiTM Cawangan Sabah khususnya ZAWAF dalam memberi bantuan zakat kepada pelajar adalah amat penting bagi mengurangkan beban kewangan yang ditanggung oleh pelajar tersebut. Manakala sistem tadbir urus dan agihan zakat UiTM Cawangan Sabah yang teratur memudahkan proses agihan zakat kepada pelajar dan menambah keyakinan orang ramai untuk terus menyumbang kepada dana zakat ini.



Rujukan

- Arahan Amanah Zakat UiTM (2019).
Bahagian Hal Ehwal Akademik UiTM. <https://hea.uitm.edu.my/v4/>. (diakses pada 04 Ogos 2023).
Kosmo. *Gaji Minimum RM1,500 Majikan Kurang 5 Pekerja Kuat Kuasa Esok*.
<https://www.kosmo.com.my/2023/06/30/gaji-minimum-rm1500-majikan-kurang-5-pekerja-kuat-kuasa-esok/>.
(diakses pada 06 Ogos 2023).
Laporan Agihan Zakat UiTM Cawangan Sabah Tahun 2022.
Mohd Nasir Ayub *et al.* (2022). Impak Agihan Zakat Pendapatan Dalam Memenuhi Keperluan Pelajar di Universiti Teknologi MARA Cawangan Kedah. *Proceedings Borneo Islamic International Conference*, (hlm. 113-118). UiTM Cawangan Sarawak:Kuching.
Muhammad, R., *et al.* (2017). Lokalisasi Unit Zakat Institusi Pengajian Tinggi Sebagai One-Stop Center Agihan Zakat Pendidikan. *Journal of Fatwa Management and Research* 10(1): 51-72.
Najahudin Lateh, Muhamad Rahimi Osman & Ghafarullahuddin Din. (2018). Aplikasi Ekonomi Digital Dalam Pengurusan Zakat dan Filantropi Islam di Universiti Teknologi MARA (UiTM) Dalam Najahudin Lateh *et al.*, (Ed.) *Aplikasi Pengurusan Zakat di Malaysia*. Shah Alam: Penerbit UiTM.
_____. (2019). Sorotan Historika 20 Tahun Kutipan dan Agihan Zakat di Universiti Teknologi MARA. *Jurnal Pengurusan dan Penyelidikan Fatwa*, 18(3), 197-210.
Nazrudin Hashim & Mohd Zainoddin Mustaffa (2012). Pengurusan Zakat di IPTA: Pengalaman dan Cabaran di UiTM Dalam The 8th UiTMCJ Academic Conference. Segamat: UiTM Johor.
Nor Rafedah *et al.* (2017). Profil Asnaf Zakat Di Kalangan Pelajar UiTM Melaka Kampus Bandaraya. *Proceeding of 2nd International Islamic Heritage Conference (ISHEC 2017)* (hlm. 635-641). UiTM Melaka:Melaka.
Pekeliling Naib Canselor Bil 06 Tahun 2019. Profil Asnaf Zakat
Razizi Tarmuji *et al.* (2022). Agihan Zakat Oleh UiTM Cawangan Sabah: Suatu Sorotan. *Proceedings Borneo Islamic International Conference*, (hlm. 124-129). UiTM Cawangan Sarawak:Kuching.